



Uimhir Chiorcláin 60/2024

Chuig: Príomhoifigeach Feidhmiúcháin – An Ghníomhaireacht um Leanaí agus an Teaghlach (TUSLA)

An Scéim Deontas Teagasc Baile do Leanaí nach bhfuil Áit Scoile acu

Réamhrá

Soláthraítear sa chiorclán seo faisnéis faoin Scéim Deontas Teagasc Baile do leanaí nach bhfuil áit scoile acu, nach bhfuil tairiscint áite scoile acu agus a bhfuil áit scoile á lorg go gníomhach dóibh.

• An Scéim Deontas Teagasc Baile do Leanaí nach bhfuil Áit Scoile acu

Ba cheart d'iarratasóirí an chiorclán seo a léamh go cúramach sula gcomhlánóidh siad na foirmeacha iarratais. I gcás nach mbeidh áit scoile ag leanbh¹ ar feadh tréimhse shealadach, nach mbeidh tairiscint áite scoile aige/aici agus go mbeidh socrúchán scoile i scoil aitheanta á lorg go gníomhach dó/di, féadfaidh an Roinn Oideachais deontas a cheadú le haghaidh teagascóir atá cáilithe go cuí a fhostú chun teagasc baile a sholáthar don leanbh sin ar feadh suas le 9 n-uaire in aghaidh na seachtaine.

Tá sa Chiorclán faisnéis faoi na nithe seo a leanas:

1. Critéir le haghaidh incháilitheachta faoi théarmaí na scéime
2. Nós Imeachta Iarratais
3. Critéir le haghaidh Cúnamh Deontais a Sholáthar
4. Tosca cosanta agus cumhdaigh leanaí do thuismitheoirí/caomhnóirí dlíthiúla
5. Na Ceanglais Ghrinnfhiosrúcháin atá ar Theagascóirí
6. Faisnéis Ghinearálta
7. Nósanna Imeachta Íocaíochta
8. Ráiteas Príobháideachta maidir le Cosaint Sonraí
9. Ceistanna agus Achomhairc

Féadfar iarratais a chur isteach ó dháta eisiúna an chiorcláin seo go dtí na dátaí deiridh atá leagtha amach thíos

Dátaí deiridh ar a nglacfar le hlarratais:

- Dáta deiridh do bhunscoileanna: 30 Bealtaine 2025
- Dáta deiridh d'iar-bhunscoileanna: 25 Aibreán 2025

¹ Sa chiorclán seo, ciallaíonn "leanbh" duine a chónaíonn sa Stát, ar duine é/í a bhfuil 6 bliana d'aois slánaithe aige/aici agus (a) nach bhfuil 16 bliana d'aois slánaithe aige/aici nó (b) nach bhfuil 3 bliana d'iar-bhunoideachas críochnaithe aige/aici, cibé acu is déanaí a tharlóidh, ach ní fholóidh sé duine a bhfuil 18 mbliana d'aois slánaithe aige/aici. (Alt 2 den Acht Oideachais (Leas), 2000).



1. Critéir le haghaidh incháilitheachta faoi théarmaí na scéime

An Scéim Deontas Teagasc Baile do Leanaí nach bhfuil Áit Scoile acu

Leis an Scéim Teagasc Baile do Leanaí nach bhfuil Áit Scoile acu, soláthraítear teagasc do leanaí nach bhfuil áit scoile acu, nach bhfuil tairiscint áite scoile acu agus a bhfuil áit á lorg go gníomhach dóibh.

Mairfidh an teagasc a sholáthrófar faoin scéim seo ar feadh 9 n-uaire ar a mhéad in aghaidh na seachtaine ar feadh tréimhse 12 sheachtain nó go dtí go dtiocfaidh an scoilbhliain chun deiridh nó go dtí go bhfaighidh an leanbh atá i gceist tairiscint áite scoile, cibé acu is túsce a tharlóidh.

Níor cheart teagasc baile a mheas a bheith ina rogha eile ar áit a áirithiú i scoil aitheanta, agus is le haghaidh idirghabháil teagasc oideachais amháin atá sé.

Tá tuismitheoir/caomhnóir dlíthiúil freagrach as áit scoile a rochtain dá leanbh. I gcás go dtiocfaidh tuismitheoir/caomhnóir dlíthiúil ar dheacracht agus é/í ag iarraidh áit scoile a fháil dá leanbh, ba cheart dó/di teagmháil a dhéanamh leis an Oifigeach Leasa Oideachais arb ionann é/í agus an t-oifigeach áitiúil de chuid Tusla - An Ghníomhaireacht um Leanaí agus an Teaghlach.

Is é Tusla an ghníomhaireacht reachtúil atá freagrach as tacú le freastal ar an scoil agus as an reachtaíocht um fhreastal ar an scoil a fhorfheidhmiú. Tairgeann sé seirbhís tacaíochta do thuismitheoirí/caomhnóirí dlíthiúla chun a chinntiú gur féidir le gach leanbh freastal go rialta ar an scoil. Is féidir mionsonraí teagmhála do na hOifigigh Leasa Oideachais a rochtain ag <https://www.tusla.ie/get-in-touch/education-and-welfare/23>.

Chun go mbreithneoidh an Roinn Oideachais iarratas ar dheontas teagasc baile, ní mór don Oifigeach Leasa Oideachais áitiúil a dheimhniú ar dtús go gcomhlíonann imthosca an linbh critéir na scéime.

Féadfar deontas teagasc a cheadú le haghaidh teagascóir atá cáilithe go cuí a fhostú chun teagasc baile a sholáthar ar feadh 9 n-uaire ar a mhéad in aghaidh na seachtaine ar feadh tréimhse 12 sheachtain nó go dtí go dtiocfaidh an scoilbhliain reatha chun deiridh nó go dtí go bhfaighidh an leanbh tairiscint áite scoile. Féadfaidh an Roinn Oideachais an teorainn uachtair 9 n-uaire a athbhreithniú ó am go ham.

2. Nós Imeachta Iarratais

I gcás Scéim Deontas Teagasc Baile na Roinne do Leanaí nach bhfuil Áit Scoile acu:

Ba cheart foirm iarratais HT NSP24 a úsáid don scéim seo.

Níl foirmeacha iarratais ar fáil ach amháin ó Oifigeach Leasa Oideachais de chuid na Ghníomhaireachta um Leanaí agus an Teaghlach.



Tá mionsonraí teagmhála ar fáil ó TUSLA: <https://www.tusla.ie/get-in-touch/education-and-welfare/>

3. Critéir le haghaidh Cúnamh Deontais a Sholáthar

Soláthraíonn an Roinn Oideachais deontas i leith Teagasc Baile a sholáthar. Cé gurb iad tuismitheoirí/caomhnóirí dlíthiúla a fhostaíonn an teagascóir i socrú príobháideach, beidh dámhachtain an deontais faoi réir na gcritéir seo a leanas:

Teagascóirí Cáilithe

Toisc gur lasmuigh den ghnáthstruchtúr scoile a dhéantar an teagasc, tá sé tábhachtach go mbeadh teagascóirí baile cáilithe chun clár oideachais cuí a sholáthar. Dá réir sin, b'fhearr go n-earcódh tuismitheoirí/caomhnóirí dlíthiúla teagascóir atá cáilithe don earnáil iomchuí ina bhfuil teagasc á sholáthar, e.g., cáilíocht i dteagasc bunscoile i gcás leanaí atá in aois bunscoile. Ceann amháin de choinníollacha na scéime is ea go mbeidh an teagascóir atá beartaithe cláraithe leis an gComhairle Mhúinteoireachta, agus go mbeidh sé/sí aitheanta aici, ar feadh thréimhse an teagaisc cheadaithe agus go dtí go n-eiseofar an íocaíocht dheireanach.

I gcás nach mbeifear in ann teacht ar mhúinteoir atá cáilithe chun teagasc san earnáil lena mbaineann, féadfaidh an Roinn breithniú a dhéanamh ar chead a thabhairt duine atá cláraithe leis an gComhairle Mhúinteoireachta agus a bhfuil bunchéim aige/aici (Leibhéal 7 ar a laghad ar an gCreat Náisiúnta Cáilíochtaí) a fhostú i réimse iomchuí. Ceann amháin de cheanglais na scéime is ea nach mór do theagascóirí fógra a thabhairt do Chomhairle Mhúinteoireachta na hÉireann a mionsonraí a chur ar fáil ar an gComhéadan Pámháistir trí shuíomh Gréasáin na Comhairle Múinteoireachta chun gur féidir leis an Roinn seo a fhíorú go bhfuil clárú reatha ag múinteoirí. Is féidir an tsaoráid sin a chumasú ar an rannán 'Mo Chlárú' ar shuíomh Gréasáin na Comhairle Múinteoireachta ag www.teachingcouncil.ie.

Chun bheith incháilithe don ráta cáilithe íocaíochta, ní mór do theagascóir bheith cláraithe leis an gComhairle Mhúinteoireachta agus bheith aitheanta aici san earnáil dá bhfuil an teagasc á sholáthar, e.g., múinteoir bunscoile cáilithe atá ag teagasc dalta bunscoile, agus múinteoir iar-bhunscoile cáilithe atá ag teagasc dalta iar-bhunscoile.

Níl Múinteoirí faoi Oiliúint ar múinteoirí Bhealach 5 iad incháilithe chun teagasc a sholáthar faoin Scéim Deontas Teagasc Baile.

Is ag an ráta athraithe a íocfar múinteoirí atá cláraithe leis an gComhairle Mhúinteoireachta in earnáil oideachais nach ionann í agus an earnáil ina bhfuil siad ag soláthar teagaisc agus múinteoirí atá cláraithe agus cáilithe agus atá ag fáil pinsean seirbhíse poiblí. Chun tuilleadh mionsonraí a fháil faoi íocaíochtaí le teagascóirí, féach <https://www.gov.ie/en/service/d15f58-home-tuition/#home-tuition-payments>.

Is iad tuismitheoirí/caomhnóirí dlíthiúla a fhostaíonn Teagascóirí Baile. Is teagascóirí féinfhostaithe iad atá faoi réir asbhaintí reachtúla ag an bhfoinse. Ní ghníomhaíonn an Roinn ach amháin mar ghníomhaire párolla thar ceann tuismitheoirí/caomhnóirí dlíthiúla.



Déanann sí amhlaidh chun comhlíonadh forálacha asbhainte reachtúla, lena n-áirítear forálacha cánachais agus forálacha gaolmhara, a éascú.

I gcás go mbeidh sé beartaithe ag teagascóir Teagasc Baile a sholáthar ar feadh níos mó ná 27 n-uaire in aon seachtain, beidh amchlár ina mionsonrófar an soláthar uaireanta ag teastáil sula ndeonófar ceadú chun tús a chur leis an teagasc.

Ní ceadmhach tús a chur le Teagasc Baile ach amháin tar éis don iarratasóir an litir ceadaithe a fháil, rud ina ndeimhneofar an dáta óna bhféadfar tús a chur leis an teagasc agus ina ndeimhneofar go ndearna an Roinn cáilíochtaí agus aitheantas an teagascóra/na dteagascóirí ainmnithe a cheadú go foirmiúil i scríbhinn.

Ní incháilithe le haghaidh teagasc a sholáthar atá múinteoirí atá ag baint leas as saoire cheadaithe íoctha nó neamhíoctha óna bhfostaíocht. Mar sin féin, féadfar múinteoir atá ar Shos Gairme nó atá ag Postroinnt a fhostú mar theagascóir do na Scéimeanna Deontas Teagasc Baile.

Tá sé de fhreagracht ar an tuismitheoir/caomhnóir dlíthiúil teagascóir a fhoinsiú a luaithe is féidir chun gur féidir leis an teagascóir iarratais ar chlárú/grinnfhiosrúchán a dhéanamh chuig an gComhairle Mhúinteoireachta, más gá. Ní choimeádann an Roinn seo liosta de na teagascóirí atá ar fáil chun teagasc baile a sholáthar. B'fhiú teagmháil a dhéanamh le scoileanna áitiúla ar an gcéad ásc. Mar mhalairt air sin, is eol don Roinn go mbaineann a lán tuismitheoirí úsáid as suíomhanna Gréasáin de chuid soláthraithe oideachais chun teagascóirí a lorg. Cuireann siad fógraí i nuachtáin áitiúla agus ar chlár fógraí siopa/pobail freisin. Ina theannta sin, chun cabhrú le tuismitheoirí teagascóir baile a fhoinsiú don scéim seo ina limistéar áitiúil, chruthaigh Líonra Príomhoidí Bunscoile na hÉireann Clár Fógraí Teagasc Baile do Thuismitheoirí chun cabhrú leo iarrthóirí oiriúnacha a fhoinsiú. Tá an clár fógraí sin ar fáil ag www.educationposts.ie

Ní fhéadfaidh tuismitheoirí/caomhnóirí dlíthiúla gníomhú mar theagascóirí dá leanáí féin faoi na scéimeanna seo.

4. Tosca Cosanta agus Cumhdaigh Leanáí do thuismitheoirí/caomhnóirí dlíthiúla

Tá sé de fhreagracht ar thuismitheoirí/caomhnóirí dlíthiúla bheith aireach ar aon rioscaí nó aon chontúirtí a d'fhéadfadh a bheith i gceist le teagascóirí a fhostú i socrú príobháideach. Tá sé de fhreagracht ar an tuismitheoir/caomhnóir dlíthiúil a chinntiú go bhfuil na coimircí iomchuí riachtanacha uile um chosaint agus leas leanáí i bhfeidhm i leith an tsocraithe teagaisc. (Féach freisin rannán 5 maidir le ceanglais ghrinnfhiosrúcháin). Tá sé de fhreagracht ar an tuismitheoir/caomhnóir dlíthiúil tabhairt faoi na seiceálacha iomchuí uile maidir lena oiriúnaí atá teagascóir ionchasach d'oibriú lena leanbh agus a dheimhniú dó/dí féin go bhfuil an duine oiriúnach dá leanbh a theagasc. Ba cheart do thuismitheoirí/caomhnóirí dlíthiúla a dheimhniú dóibh féin freisin go bhfuil teagascóirí ar an eolas faoi aon riachtanais iomchuí leighis agus iompraíochta atá ag an leanbh.



Leis an Acht um Thús Áite do Leanaí, 2015, cuireadh gnéithe den doiciméad ‘Tús Áite do Leanaí: Treoir Náisiúnta um Chosaint agus Leas Leanaí’ ar bhonn reachtúil.

Leagtar amach sa doiciméad ‘Tús Áite do Leanaí: Treoir Náisiúnta um Chosaint agus Leas Leanaí’ na hoibleagáidí reachtúla a bhfuil feidhm acu maidir le daoine sainordaithe amhail múinteoirí cláraithe agus na hoibleagáidí reachtúla a bhfuil feidhm acu maidir le heagraíochtaí (amhail scoileanna) faoin Acht. Leagtar amach ann freisin na hoibleagáidí (neamhreachtúla) dea-chleachtais a bhfuil feidhm acu maidir le gach duine aonair (lena n-áirítear múinteoirí) agus le gach earnáil den tsochaí. Oibrítear an tAcht um Thús Áite do Leanaí, 2015, le hais an doiciméid ‘Tús Áite do Leanaí: Treoir Náisiúnta um Chosaint agus Leas Leanaí, 2017’.

Is féidir faisnéis faoi Chosaint Leanaí a fháil ar shuíomh Gréasáin na Roinne ag <https://www.gov.ie/en/policy-information/9e0b6-child-protection-in-schools/>

5. Na Ceanglais Ghrinnfhiosrúcháin atá ar Theagascóirí

Ceann amháin de na ceanglais faoi na hAchtanna um an mBiúró Náisiúnta Grinnfhiosrúcháin (Leanaí agus Daoine Soghonta), 2012 go 2016, is ea go ndéanfaidh an Biúró Náisiúnta Grinnfhiosrúcháin (an Biúró) grinnfhiosrúchán ar dhaoine aonair a oibríonn le leanaí agus le daoine soghonta.

Ní mór don Bhiúró Náisiúnta Grinnfhiosrúcháin grinnfhiosrúchán an Gharda Síochána a dhéanamh ar gach teagascóir sula gcuirfeadh tús le teagasc a sholáthar.

Ní mór do thuismitheoirí/caomhnóirí dlíthiúla nochtadh nua-eisithe Grinnfhiosrúcháin an Gharda Síochána a iarraidh in imthosca ina bhfuil siad ag fostú an teagascóra den chéad uair riamh.

Ba cheart do thuismitheoirí/caomhnóirí dlíthiúla a thabhairt faoi deara go bhféadfaidh gach múinteoir cláraithe iarratas a dhéanamh trí shuíomh Gréasáin na Comhairle Múinteoireachta go ndéanfaí Grinnfhiosrúchán an Gharda Síochána orthu. Tá an próiseas saor in aisce agus is gnách go dtógann sé idir dhá sheachtain agus ceithre seachtaine chun é a chur i gcrích.

Ní mór do thuismitheoirí/caomhnóirí dlíthiúla a dheimhniú dóibh féin gur chuir a dteagascóir(i) roghnaithe próiseas Grinnfhiosrúcháin an Gharda Síochána i gcrích trí phróiseas Grinnfhiosrúcháin an Gharda Síochána a reáchtáil an Chomhairle Mhúinteoireachta ar líne é agus ní mór dóibh a dheimhniú dóibh féin go bhfuil ráiteas nocht Grinnfhiosrúcháin an Gharda Síochána atá bailí ag an teagascóir/na teagascóirí. Is féidir leo amharc ar dháta an ghrinnfhiosrúcháin agus ar an toradh a bhí air trí amharc ar an toradh ar chuardach grinnfhiosrúcháin an teagascóra. Tugtar **Nochtadh Grinnfhiosrúcháin** air sin agus féadfaidh an teagascóir é a chomhroinnt trí Digitary, an réiteach slán TF ar líne atá i bhfeidhm ag an gComhairle Mhúinteoireachta.



Ba cheart do thuismitheoirí/caomhnóirí dlíthiúla a bheith ar an eolas nach gciallaíonn grinnfhiosrúchán rathúil go bhfuil imréiteach ag teagascóirí chun oibriú le leanaí agus, ina ionad sin, nach dtugtar ann ach mionsonraí faoi aon taifead coiriúil agus/nó aon fhaisnéis shonraithe i leith an teagascóra lena mbaineann nó gurb amhlaidh, i gcás nach bhfuil aon taifead coiriúil nó aon fhaisnéis shonraithe ann, a chuirtear an méid sin in iúl ann.

Ó thaobh cosanta leanaí de, is faoin thuismitheoir/caomhnóir dlíthiúil lena mbaineann atá sé an cinneadh críochnaitheach a dhéanamh ar a oiriúnaí atá an duine d'oibriú leis an dalta. Chuige sin, ba cheart do thuismitheoirí/caomhnóirí dlíthiúla a thabhairt faoi deara nach é atá sa toradh ar Ghrinnfhiosrúchán an Gharda Síochána ach toisc amháin atá le cur san áireamh le linn teacht ar an gcinneadh sin. Gné bhunriachtanach de dhea-chleachtas cosanta leanaí is ea seiceálacha críochnúla a dhéanamh ar oiriúnacht an duine agus is é/í an thuismitheoir/caomhnóir dlíthiúil atá freagrach as na seiceálacha sin. Ba cheart teistiméireachtaí a lorg agus gníomh leantach a dhéanamh ina leith agus a chinntiú go mínítear go sásúil aon bhearnaí neamh-mhínithe i dtaifid fostaíochta/curriculum vitae a bheith ar áireamh sna seiceálacha sin, ach gan a bheith teoranta dóibh. Níor cheart grinnfhiosrúchán a dhéanamh in ionad na seiceálacha sin. Ina ionad sin, ní mór é a úsáid mar chuid den chéanna.

Tabhair faoi deara nach mór Foirm Dearbhaithe Reachtúil (Aguisín 1 a ghabhann leis an bhFoirm Iarratais Iomchuí) a bheith ag gabháil le gach iarratas ar Theagasc Baile.

Tá faisnéis iomlán do theagascóirí maidir leis an bpróiseas um iarratas a dhéanamh ar Ghrinnfhiosrúchán an Gharda Síochána ar fáil ag <https://www.teachingcouncil.ie/en/Vetting-Re-vetting>.

6. Faisnéis Ghinearálta

Ceanglófar ar iarratasóirí Foirm Iarratais a chomhlánú, agus iarrtar orthu aird ar leith a thabhairt ar na doiciméid/ar an bhfaisnéis a cheanglaítear. Ba cheart a thabhairt faoi deara nach dtabharfar ceadú ach amháin tar éis an próiseas iarratais ina iomláine a chur i gcrích, rud a thagann chun deiridh nuair a eisítear litir ceadaithe ina ndeimhnítear an dáta óna bhféadfar tús a chur leis an teagasc.

Is le haghaidh idirghabhálacha teagaisc oideachais amháin atá an Deontas Teagasc Baile. Forchoimeádann an Roinn an ceart chun meastóireacht a dhéanamh ar an soláthar oideachais atá á sholáthar, agus ceadaítear na huaireanta uile faoi réir an choinníll sin.

Ceadaítear deontais Teagasc Baile chun clár oideachais atá saincheaptha don duine aonair a sholáthar. Dá bhrí sin, ní mór do theagascóirí teagasc a sholáthar ar bhonn duine le duine idir 9.00am agus 6.00pm (gan laethanta saoire scoile agus bainc agus an deireadh seachtaine a áireamh) mura gceadaíonn an Roinn a mhalairt.

Is ar fáil ag an nasc thíos atá na sosanna caighdeánacha um Nollaig, um Cháisc agus ag an Lár Téarma sa chéad téarma agus sa dara téarma don scoilbhliain:
<https://www.gov.ie/en/service/388196-school-holiday-dates/>.



Ní fhéadfar uaireanta neamhúsáidte ó aon seachtain ar leith a aistriú chuig seachtain ina dhiaidh sin.

I gcás iarratais ar dheontas i leith siblíní, beidh gach siblín i dteideal Teagasc Baile a fháil ar feadh 9 n-uaire in aghaidh na seachtaine.

Más rud é go mbeidh iarratas á dhéanamh ar níos mó ná teagascóir amháin, ní mór do gach teagascóir atá beartaithe rannán 3 den fhoirm iarratais a chomhlánú. Ní mór don iarratasóir an líon iomlán uaireanta teagasc a sholáthróidh gach teagascóir a lua go soiléir. Deimhneofar sa litir ceadaithe an líon iomlán uaireanta do gach teagascóir.

Ní mór do dhaltáí atá ag déanamh staidéar ar ábhair le haghaidh scrúduithe an Teastais Shóisearaigh agus na hArdteistiméireachta eolas a chur go cúramach ar cheanglais Choimisiún na Scrúduithe Stáit le haghaidh obair chúrsa phraiticiúil. Is féidir na hábhair a bhfuil obair chúrsa phraiticiúil i gceist leo a aimsiú ag www.examinations.ie. Mura gcomhlíontar ceanglais Choimisiún na Scrúduithe Stáit, is féidir nach mbeidh dalta in ann na marcanna uile atá ar fáil don ábhar a bhaint amach.

7. Nósanna Imeachta Íocaíochta

Ba cheart do thuismitheoirí/caomhnóirí dlíthiúla agus do theagascóirí a chinntiú go bhfuil siad ar an eolas go hiomlán faoi choinníollacha na scéime seo agus go gcomhlíonann siad go hiomlán iad agus go bhfuil siad ar an eolas faoi conas a eiseofar an íocaíocht deontais faoin scéim seo sula soláthrófar aon teagasc.

Is i socrú príobháideach le haghaidh Teagasc Baile a sholáthar a fhostaíonn thuismitheoirí/caomhnóirí dlíthiúla teagascóirí.

Tá na híocaíochtaí arna ndéanamh le teagascóirí thar ceann an iarratasóra faoi réir asbhaintí reachtúla ag an bhfoinse. Ní ghníomhaíonn an Roinn ach amháin mar ghníomhaire párolla thar ceann an thuismitheora/an chaomhnóra dlíthiúil. Déanann sí amhlaidh chun comhlíonadh forálacha asbhainte reachtúla, lena n-áirítear forálacha cánachais agus forálacha gaolmhara, a éascú.

I gcás go mbeidh leanbh faoi chúram TUSLA, is go díreach le TUSLA, agus ní leis an teagascóir, a dhéanfar aon íocaíochtaí i leith teagasc baile.

Cuirtear in iúl do thuismitheoirí/caomhnóirí dlíthiúla nár cheart dóibh, in imthosca ar bith, íocaíochtaí a dhéanamh le teagascóirí as teagasc arna sholáthar acu faoin scéim seo.

Tá Rátaí an Deontais Teagasc Baile ar fáil ag <https://www.gov.ie/en/service/d15f58-home-tuition/#home-tuition-payments> agus tá siad faoi réir athruithe.

Má dhéantar dearbhú bréagach chun acmhainní a éileamh ón Roinn, is féidir go dtarchuirfidh an Roinn an ní chuig an nGarda Síochána agus, más cuí, chuig an gComhairle Mhúinteoireachta.



Ba cheart do thuismitheoirí/caomhnóirí dlíthiúla agus do theagascóirí a thabhairt faoi deara gurb amhlaidh, faoin reachtaíocht atá ann cheana, a chuirtear mionsonraí airgeadais i leith na scéime seo ar aghaidh chuig na Coimisinéirí Ioncaim gach bliain, ós rud é gurb ináirithe chun críocha cánach atá íocaíochtaí teagasc baile.

Conas a íoctar an deontas: Tá nóta faisnéise íocaíochta leithleach atá níos mionsonraithe ar fáil do thuismitheoirí/caomhnóirí dlíthiúla agus do theagascóirí ar shuíomh Gréasáin na Roinne ag: <https://www.gov.ie/en/service/d15f58-home-tuition/#home-tuition-payments>.

8. Ráiteas Príobháideachta maidir le Cosaint Sonraí

A mhéid is indéanta agus ag féachaint do na hacmhainní atá ar fáil, soláthraíonn an Roinn Oideachais do dhaoine a bhfuil cónaí orthu sa Stát oideachas agus oiliúint is cuí chun freastal ar na riachtanais agus ar an gcumas atá acu. Is é an príomhchúis a dteastaíonn ón Roinn na sonraí pearsanta atá tugtha agat ná incháilitheacht don Scéim Deontas Teagasc Baile a chinneadh. Déanfar na sonraí pearsanta atá tugtha a chomhroinnt le TUSLA (an Ghníomhaireacht um Leanaí agus an Teaghlach), leis an gComhairle Náisiúnta um Oideachas Speisialta, leis an Roinn Oideachais agus leis na Coimisinéirí Ioncaim chun incháilitheacht don Scéim Deontas Teagasc Baile a chinneadh, chun íocaíochtaí a phróiseáil, chun a chinntiú nach mbeidh aon dúbláil cistiúcháin ann agus chun críocha staidrimh.

Is féidir an Fógra Príobháideachta ina leagtar amach tuilleadh faisnéise i ndáil leis an Scéim seo a fháil ag: www.gov.ie – [Fógraí Príobháideachta an Rialacháin Ghinearálta maidir le Cosaint Sonraí \(www.gov.ie\)](#)

Is ar fáil ag <https://www.gov.ie/en/collection/general-data-protection-regulation-gdpr-privacy-notice/> atá mionsonraí iomlána faoi bheartas Cosanta Sonraí na Roinne, áit a leagtar amach an dóigh a n-úsáidfimid do shonraí pearsanta nó sonraí pearsanta do linbh agus a leagtar amach faisnéis maidir le do chearta mar ábhar sonraí.

Tá mionsonraí faoin mbeartas sin ar fáil i gcruachóip freisin ach iad a iarraidh.

9. Ceisteanna agus Achomhairc

Is féidir ceisteanna i ndáil le deontais a **dhámhachtain** faoin Scéim Deontas Teagasc Baile a sheoladh chuig:

An tAonad um Thuismitheoirí agus Fhoghlaimeoirí - An Rannóg um Theagasc Baile

An Roinn Oideachais

Corr na Madadh

Baile Átha Luain

Co. na hIarmhí

N37 X659

Uimhir Theagmhála: 090 648 4108

Seoladh Ríomhphoist: hometuitionapprovals@education.gov.ie



Féadfar **achomhairc** i ndáil le cinní arna ndéanamh faoin Scéim Deontas Teagasc Baile a chur isteach i scríbhinn chuig an seoladh thuas, agus an Uimhir Thagartha Teagasc Baile á lua, breac-chuntas á thabhairt ar na cúiseanna leis an achomharc, agus doiciméid bhreise nó tuarascálacha breise á dtabhairt, de réir mar is cuí.

Is féidir ceisteanna i ndáil le **híocaíochtaí** faoin scéim Teagasc Baile a sheoladh chuig:
Deontais Riachtanas Speisialta agus Deontais Teagasc

An Roinn Oideachais

Corr na Madadh

Baile Átha Luain

Co. na hIarmhí

N37 X659

Uimhir Theagmhála: 090 648 3996

Seoladh Ríomhphoist: htpayments@education.gov.ie

Tá an Ciorclán seo, i dteannta na faisnéise iomchuí ar fad, ar fáil le híoslódáil ó shuíomh Gréasáin na Roinne –

[gov.ie](http://www.gov.ie) - [An Scéim Deontas Teagasc Baile do leanáí nach bhfuil áit scoile acu \(www.gov.ie\)](http://www.gov.ie)

Joanne Tobin

Príomhoifigeach

An tAonad um Thuismitheoirí agus Fhoghlaimoirí

Lúnasa 2024